



Sezoen 2013 -2014 nó: 1

't Seizoen is begoosj dus: Zelig Nuut Jaor



Maondig waar 't de 11e van de 11e d'n daag wo op tradisjoneel de viefde Jaorestied begint. 't Vastelaovessezoen is gesjart. Ein lank seizoen went eesj op 5 maart is 't Essjelegounsdig. Ein seizoen wo in ouch 't 12 x 11-jubbelei van De Marotte wurt gevierd. Dus veer wunsje uch alleneij ein Zelig Nuut Jaor mit vööl sjpas en sjaele kal.



Zóndig: Dialèk-mès

In Zitterd wurt 't Vastelaovessezoen kómmende Zóndig geöpend. En wie kèns ze ein seizoen baeter beginne, op eine nuchtere maag mit ein momènt van euverdènking en relatieveiering. Daoróm is om 11.00 oer in de Groote Kirk ein dialèkmès die muzikaal wurt opgeloesterd door de Marottekapel en Math Dirks.

Äöpening Seizoen vanaaf 13.33 oere



Zóndigmiddig 17 november vanaaf 13.33 oere wurt in Theater Forum aan de Engelekkampsjtraot d'n aaftrap gedaon veur 't Jubbeleisezoen; 12 x 11 jaor De Marotte. Jederein is geneud en d'r is geine entree.

Ónger 't motto "Zitterd dreet door!" prizzenteiere De Marotte 't pregram veur 't kómmende seizoen. Tradisjoneel wurt ouch de nuuj Marotte-CD, de 25^e alweier, aan uch veurgesjteld. En d'r zal ein keur van artiste veur uch optraëe, veer nuime; W-Dreej, Domm en Dööl, de Marottekapel, Aafsjaag Zitterd en d'r is dans van jazz-dance Swentibold en dansgróp Xanadu.



Dan wurt d'r ouch nog aan 't raad van Fortuun gedreet, ónger 't motto; "Zitterd dreet door". Daobie zeen geweldige prieze te wènnen; laes meer dao euver in 't volgende sjtökske.. Aan drank en hepkes komp geer niks tekort, en natuurlijk is d'r ouch ein sjpissjaal pregram veur de Kènjer. Dus: Zeet geer alleneij weier dao ?

Sjitterende prieze in de Jubbelei-laoterie



Es geer hiebaove hób kenne laeze wurt d'r zóndig sjtevig aan 't Raad van Fortuun gedreet. Dit ónger 't jubbelei-motto: Zitterd dreet door. Daobie zeen d'r sjitterende prieze te wènnen. Waat te dènke van VIP-kaarte veur de nuujste film; Hemel op Aarde mit o.a. Bram van Schie, Jeroen van Koningsbrugge, Hub Stapel en Lies Visschedijk. Ein bellónvaart, eine sjmink workshop, ein serenaad door de Marottekapel zelf of combi-kaarte veur Groove Garden. En es oetsjmieter kènt geer eine avond wènnen, wobie geer in het pak van mascotte "Fortunior" uch maag oetlaeve bie ein van die sjitterende toeswedsjtrieje van Fortuna Zitterd.




Wèn twee vriekaarte veur de film Hemel en Aarde

Veur de troew laezesj van ózze nuutsbreif höbbe veer ein leuke aksie. Van de produsent van de film 'Hemel op aarde' mage veer ein set van twee vriekaarte weggave veur dees film in sinema Foroxity in Zitterd. Sjik ós eine mail van maksimaal 44 weurd wo-in veurkump 'Hemel op Aarde' en 'Zitterd dreet door'. Euvertuug en verrasj ós en win. Insjikke nao info@marotte.nl. In de volgende nuutsbreif gaeve veer nog éns ein set van 2 kaarte weg.



Eesjte Nónnevot veur Pierre Diederens

111-daag veur Vastelaovend wurt door de Prinsegarde Zitterd de eesjte nónnevot oetgereik aan eine persoon oetgereik dae zich saer jaor en daag verdeinstelik maak veur de Zittesje vastelaovend. Dit jaor veil *111 daag veur vastelaovend* oppe 11^e van de 11^e, ein baeter momènt waar neit dènkbaar. Ditmaol veil Optoch Kommittee Zitterd veurzitter Pierre Diederens de eer te beurt óm de eesjte Nónnevot in óntvangs te numme.



De Pappagey zuik 'Kolder'

Es urges hawverwaegde fibberwari 't liefblad van De Marotte; De Pappagey veur de 12 x 11^e maal zal oetvleige. Mót nog gans vööl wirk gedaon waere. Veer wille waal alvas verklappe dat d'n opzat van de Pappagey beheurlik geit verangere. Mer dao kóm v'r bènnekort op trök.

Waat neit geit verangere is dat de redaksie eur hulp neudig haet. Höb geer nog get bezunjers mitgemaak, höb geer kolderieke foto's..... Twiefel neit en sjik ze op nao de redaksie van de Pappagey. Dit kan via: pappagey@marotte.nl



De Belastingdeins op bezuk in de Optochhal

Op 12 november kreeg de Zittesje Optochhal bezuk van de belastingdeins. Nae neit omdat 't Optoch Kommittee häör zakes neit in orde haw. Mèr de belastingdeins haw veur ein 40-tal projek-mennesjers de Optochhal oetgekaoze veur ein konferens mit es thema "Project Carnaval". Dus me is aan de sjaag gegange mit iezel, foam en verf. 't Is dus neit ondènkbaar dat me volgend jaor eine eige waage geit boewe. En geer wit 't: 't Optoch Kommittee maakte 't hun; mekkelikker én leuker.....



Jubbeleikroniek wurt aangebaoëe door de Senaat

Bie gelaeg van 't 12 x 11 jubbelei van De Marotte versjient d'r eine kroniek dae wurt aangebaoëe door de Senaat van de Marotte. De kroniek besjeit de periode vanaaf 't 111-jaorig besjtaon in 1992/1993 pès aan 't 12 x 11-jaorig besjtaon waat kómmend seizoen wurt gevierd. Sjrievèsj van dees driede Marotte kroniek zeen de senatoren Harry Strijkers en Philip Schaeken. Dees 208 blaajer dikke kroniek wurt kómmende zóndig aan de jubbeleierende vereining aangebaoëe. De kroniek is te koup bie Boukhanjel Deeder en in de Marottewinkel.

Meer infermase: www.marotte.nl

 <http://www.facebook.com/DeMarotteZitterd>

 http://twitter.com/marotte_zitterd